

Arubiano nombra como Gobernador di Corsou

Ayera gobierno demisionario di Hulanda a anuncia cu Consejo di Minister a aproba e nombramento di Sr. Maurits de Kort como Gobernador di Corsou. De Kort, ken a nace na Aruba, ta bira sucesor di e Gobernador actual, Su Excelencia Sra. Lucille George-Wout, kende su di dos periodo como Gobernador ta caduca dia 4 di november. E nombramento di Sr. De Kort ta pa un periodo di seis aña y lo drenta na vigor dia 4 di november 2025.

Sr. Maurits de Kort di 51 aña di edad actualmente ta fungi como Presidente di Corte Comun di Husticia di Aruba, Corsou, Sint Maarten y di Boneiro, Sint Eustatius y Saba desde 2022. Anteriormente, entre 2017 y

2022, Sr. De Kort tabata miembro di directiva di Corte Comun como vicepresidente di Sucursalnan di Corsou y Boneiro.

El a cuminsa su carera como abogado na bufetanan di abogado na Corsou, Sint Maarten y Aruba y ta hues desde 2011. El a studia na entre otro Universidad di Leiden y Universidad di Londres. Durante su carera el a ocupa diferente funcion di maneho na organisacionnan cultural y social na Corsou y Sint Maarten.

Como Gobernador di Corsou, Su Excelencia De Kort ta representa Rey y ta den e funcion ey ta e cabes di gobernacion di Corsou, y e ministernan ta responsabel na e Parlamento di Corsou pa e accionnan di

Gobernador. Como organo di Reino, Gobernador ta representa gobierno di Reino.



Holor malo y toxico afectando barionan

Stichting Parkietenbos ta pidi pa accion di parti di Gobierno nobo

Den e dlanan aki e molestia di holor malo den e barionan di Simeon Antonio, Parkietenbos y Mahuma a bira mas frecuente. Ta trata aki di holor malo y aire toxico cu ta biniendo di Ser'i Teishi, Barcadera y di e Dump na Parkietenbos.

Di parti di Stichting Parkietenbos ta informa cu nan a reuni cu tur dos formador durante di e periodo di formacion di Gobierno nobo. Durante di e reunion aki nan a haci entrega di un rapport di un trabao investigativo haci pa un experto cu a indica tur e preocupacionnan cu e habitantenan di e barionan tin. Gobierno anterior por medio di minister Ursell Arends no a produci ningun solucion pa

maneho di desperdicio duradero y sostenibel.

E la ignora e reclamo di e habitantenan di e barionan na multiple ocasion y a simplemente sigui permiti e compania cu ta procesando desperdicio pa gobierno pa sigui dera sushi na Ser'i Teishi cu tur e consecuencianan. E barionan ta wordo afecta for di tur angulo cu biento supla cu holor malo.

Awor en specialmente pa motibo di e temporada di Horcan cu a cuminsa, hasta ora cu biento cay e holor malo ta drenta den e barionan afectando tur cas, oficina y hotel den e bisindario. Stichting Parkietenbos ta reclamando cu gobierno ta permiti pa viola e derecho di hende di

hala rosea di aire limpi y esaki no por continua. Sr. Aldrich Croes cu ta presidente di e fundacion a remarca cu 2 aña pasa a sinta den un sesion di Crisis cu e oficina di maneho di crisis di Gobierno y tur departamento di Gobierno a haya un presentacion di con grave e situacion ta.

Bisiñanan a comparti na tur presente con nan ta sufrí cu e aire malo cu ta bin for di tres direccion y for di Ser'i Teishi, Barcadera, y Dump na Parkietenbos. Ta p'esey a fundacion a manda busca un experto pa traha un rapport di e situacion critico aki. A entrega e rapport aki na formadornan nobo y actual Prome Minister y actualmente e fundacion ta wardando riba reunion y accion di parti di e



gobierno nobo.

Ken cu pasa den e barionan aki awe y den e dlanan venidero lo por haya e holor y sinti kico e habitantenan ta pasa aden. E cantidad di casonan di Cancer den e barionan ta alarmante, recientemente

hasta un miembro di bestuur a perde su tata pa motibo di cancer di pulmon. E holor malo di Ser'i Teishi tabata afecta nan bario continuamente. E pueblo ta pidiendo Auxilio y ta pidiendo Gobierno nobo pa actua.

Fundacion Zinnia ta saca documentario "Bida ta Sigui"

Pa conscientisa y yuda famianan surpasa e dolor di perdida di un ser keri

Recientemente Fundacion Zinnia a saca e documentario "Bida ta Sigui" cu tin como meta no solamente informa, pero conscientisa tur famia cu a yega di perde un ser keri pa motibo di un chauffeur cu tabata core auto bao di influencia cu bida ta continua.

Ya ta 10 aña di fayecimento di e hobencita Zinnia Croes ken a perde su bida despues cu el a ser alcanza pa un chauffeur cu tabata tras di stuur bao di influencia. Mayornan di Zinnia a lanta Fundacion Zinnia y a traves di e fundacion ta

bata enfoca riba conscientizacion tocante stuur bao di influencia.

Aworaki Fundacion Zinnia a anuncia cu nan ta saca e documentario "Bida ta Sigui" caminda famia di Zinnia ta habri nan portanan pa Aruba conoce y siña kico e famia a pasa den dje despues di e fayecimento lamentabel di Zinnia.

Den e documentario e famia y sernan keri di Zinnia ta papia tocante ki consecuencia un accidente y un persona cu ta maneha y ta haci escogencia pa core auto bao di

influencia di alcohol tin no solamente pa e mama, tata y ruman di Zinnia, pero tambe tur hende cu tabata rond di dje.

Ademas e documentario ta toca tambe e tema di salud mental cu ta un parti importante ora cu famia ta pasa den trauma manera perde un ser keri, un yiu.

E meta tras di e documentario ta pa duna algo na e famianan back cu ta pasa den situacionnan similar y enfoca riba motiva y conscientisa tur famia cu a pesar di e dolor bida ta continua.

